



REPUBLIKA E SHQIPËRISË  
MINISTRI I SHTETIT  
PËR DIASPORËN



AGJENCIA  
KOMBËTARE  
E DIASPORËS

# KËSHILLI KOORDINUES I DIASPORËS

---

## PERMBAJTJA

<b>HYRJE</b> .....	1
<b>KËSHILLI KOORDINUES I DIASPORËS</b> .....	2
LIGJ nr. 16, datë 05.04.2018 “Për Diasporën”.....	2
VENDIM nr.340, datë 06.06.2018 “Për Përcaktimin e Rregullave të Hollësishme për Kushtet dhe Mënyrën e Zgjedhjes së Përfaqësuesve të Këshillit Koordinues të Diasporës”.....	11
VENDIM nr.195, datë 05.04.2019 “Për Miratimin e Anëtarëve të Këshillit Koordinues të Diasporës”.....	14
VENDIM nr.320, datë 15.05.2019 “Për Statusin e Anëtarëve të Këshillit Koordinues të Diasporës”.....	16
<b>ANËTARËT E KËSHILLIT KOORDINUES TË DIASPORËS</b> .....	18
<b>JETËSHKRIMET E ANËTARËVE TË KËSHILLIT KOORDINUES TË DIASPORËS</b> .....	19

## Hyrje

Këshilli Koordinues i Diasporës është një strukturë e cila funksionon për herë të parë në historinë e shtetit shqiptar. Ai është ngritur dhe funksionon mbi bazën e Ligjit Nr. 16/2018 “Për Diasporën”.

Misioni i Këshillit Koordinues të Diasporës është mbrojtja dhe forcimi i marrëdhënieve me Diasporën shqiptare. Këshilli Koordinues i Diasporës është organi përfaqësues i marrëdhënieve të Diasporës shqiptare me institucionet e shtetit të Shqipërisë. Në mbledhjet e tij të rregullta marrin pjesë përfaqësuesit më të lartë të institucioneve shtetërore.

Këshilli përbëhet nga 15 përfaqësues të Diasporës, të spikatur në fushat e arsimit, shkencës, kulturës e fusha të tjera si edhe me një kontribut të vazhdueshëm në promovimin e interesave të kombit shqiptar dhe veçanërisht në çështjet e Diasporës shqiptare. Anëtarët e Këshillit Koordinues të Diasporës zgjidhen sipas një procedure të miratuar dhe gëzojnë status të veçantë.

Anëtarët e Këshillit, në funksion të përmbushjes së detyrave të tyre, kanë të drejtë të kërkojnë informacion në fushat e përgjegjësisë së institucioneve shtetërore përgjegjëse, të propozojnë akte administrative, të marrin pjesë në seanca dëgjimore në Komitetin Shtetëror të Diasporës ose në Komisionet e Kuvendit të Shqipërisë për çështje që kanë të bëjnë me interesat e Diasporës shqiptare dhe bashkëpunimit e kontributit të saj për zhvillimin e vendit.

Ky dokument është një përmbledhje informuese e bazës ligjore dhe anëtarëve të Këshillit Koordinues të Diasporës.

**REPUBLIKA E SHQIPËRISË  
KUVENDI**

**LIGJ**

**Nr. 16/2018**

**PËR DIASPORËN**

Në mbështetje të neneve 78 dhe 83, pika 1, të Kushtetutës, me propozimin e  
Këshillit të Ministrave,

**K U V E N D I**

**I REPUBLIKËS SË SHQIPËRISË**

**V E N D O S I:**

**KREU I**

**DISPOZITA TË PËRGJTHSHME**

**Neni 1  
Objekti**

Ky ligj ka për objekt përcaktimin e rregullave për:

- a) kompetencat e autoriteteve shtetërore përgjegjëse për marrëdhëniet me diasporën;
- b) mënyrën e mbajtjes, të forcimit dhe realizimit të lidhjeve të diasporës me vendin e origjinës;
- c) krijimin e Këshillit Koordinues të Diasporës;
- d) dhënien e çmimeve kombëtare në fushën e marrëdhënieve ndërmjet vendit të origjinës dhe diasporës;
- e) ruajtjen dhe kultivimin e identitetit kombëtar, gjuhësor, kulturor e arsimor të pjesëtarëve të diasporës dhe lidhshmërinë e tyre me institucionet shtetërore në vendin e origjinës.

**Neni 2  
Përkufizime**

Në këtë ligj termat e mëposhtëm kanë këto kuptime:

1. “Agjencia Kombëtare e Diasporës”, në vijim “Agjencia”, është organi shtetëror përgjegjës për marrëdhëniet me diasporën.
2. “Diaspora” përfshin:
  - a) komunitetet e hershme shqiptare në botë;

- b) çdo person, i cili është lindur në Shqipëri dhe jeton jashtë kufijve të saj;
- c) çdo person që gëzon origjinë shqiptare, i cili ka lindur jashtë kufijve të Shqipërisë, mban lidhje gjuhësore, kulturore e të traditës në vazhdimësi dhe që ka dëshirë të ruajë lidhjet me Shqipërinë.
- 3. “Ministër përgjegjës” është ministri që mbulon fushën e veprimtarisë shtetërore për marrëdhëniet me diasporën.
- 4. “Vend i origjinës” është Republika e Shqipërisë.
- 5. “QKD” është qendër kulturore për diasporën, themeluar në vendet me interes për diasporën dhe Republikën e Shqipërisë.
- 6. **“Këshilli Koordinues i Diasporës” (Këshilli) është organi përfaqësues dhe koordinuese i marrëdhënieve me diasporën.**
- 7. “Organizata e diasporës” është organizim vullnetar i pjesëtarëve të diasporës.

## KREU II ORGANET SHTETËRORE PËRGJEGJËSE PËR MARRËDHËNIET ME DIASPORËN

### Neni 3 Organet shtetërore përgjegjëse për diasporën

Organet shtetërore përgjegjëse për marrëdhëniet me diasporën janë:

- 1. Këshilli i Ministrave.
- 2. Komiteti Shtetëror për Diasporën.
- 3. Ministri përgjegjës për Diasporën.
- 4. **Këshilli Koordinativ për Diasporën.**
- 5. Agjencia Kombëtare e Diasporës.
- 6. Qendrat kulturore për Diasporën.
- 7. Fondi Shqiptar për Zhvillimin e Diasporës.
- 8. Qendra e Botimeve për Diasporën.
- 9. Autoritete të tjera shtetërore, në përputhje me fushën e tyre të veprimtarisë.

### Neni 4 Këshilli i Ministrave

Këshilli i Ministrave përcakton:

- a) politikat e vendit të origjinës për diasporën, për t’u zbatuar nga organet shtetërore përgjegjëse për marrëdhëniet me diasporën;
- b) mënyrën dhe politikat për regjistrimin e shtetasve shqiptarë që jetojnë jashtë territorit të Republikës së Shqipërisë.

### Neni 5 Ministri përgjegjës për diasporën

Ministri përgjegjës për diasporën ushtron këto kompetenca:

- a) i propozon Këshillit të Ministrave nxjerrjen e akteve rregulluese dhe marrjen e masave të tjera të nevojshme për realizimin e politikës shtetërore për marrëdhëniet me diasporën;

- b) mbikëqyr dhe koordinon zbatimin e Strategjisë Kombëtare për Marrëdhëniet me Diasporën;
- c) mban dhe monitoron marrëdhëniet me diasporën;
- ç) krijon dhe përditëson në mënyrë sistematike të dhëna për organizimin e saj në forume;
- d) bashkëpunon me ministrinë përgjegjëse, sipas fushave të veprimtarisë, për themelimin e qendrave kulturore dhe informative në vendet ku jeton diaspora;
- dh) i propozon Kryeministrit dhënien e çmimeve për kontribute të veçanta në ruajtjen e forcimit e lidhjeve ndërmjet vendit të origjinës dhe diasporës, si dhe për kontribute të veçanta në promovimin e Shqipërisë në botë;
- e) krijon marrëdhënie dhe promovon aktivitete përafuese e lidhëse me ambasadat përkatëse në shtete ku jeton diaspora;
- ë) ushtron kompetenca të tjera, sipas legjislacionit në fuqi.

## Neni 6

### Qendrat kulturore për diasporën

1. QKD-të krijohen me qëllim ruajtjen, kultivimin e identitetit kombëtar, gjuhësor, kulturor e arsimor të diasporës dhe forcimin e lidhjeve të saj me institucionet e Republikës së Shqipërisë.
2. QKD-të ushtrojnë veprimtarinë në vendet me interes për diasporën e Republikës së Shqipërisë dhe hapen në marrëveshje me këto vende.
3. Kreu i QKD-së emërohet dhe lirohet me urdhër të ministrit përgjegjës për punët e jashtme, me propozim të ministrit përgjegjës për diasporën. Kreu i QKD-së gëzon status diplomatik, për periudhën e ushtrimit të detyrës, dhe pajiset me pasaportë diplomatike.
4. QKD-ja është në varësi të kreut të misionit diplomatik të akredituar në atë vend dhe ushtron funksionet në përputhje me detyrimet që rrjedhin nga ky ligj dhe detyrime të tjera që burojnë nga legjislacioni në fuqi.
5. Marrëdhëniet e punës për punonjësit e QKD-së rregullohen sipas dispozitave në fuqi të Kodit të Punës. Rregullat e hollësishme për rekrutimin e punonjësve përcaktohen me vendim të Këshillit të Ministrave, me propozim të ministrit përgjegjës për diasporën dhe ministrit përgjegjës për punët e jashtme.
6. Krijimi, organizimi, mënyra e funksionimit dhe nivelet e pagave të QKD-së miratohen me vendim të Këshillit të Ministrave.
7. Struktura dhe organika e QKD-së miratohen me urdhër të Kryeministrit.
8. Agjencia Kombëtare e Diasporës bashkëpunon dhe koordinon veprimtaritë me QKD-të.

## Neni 7

### Përgjegjësitë e QKD-së

1. QKD-ja ka përgjegjësi:
  - a) të promovojë Shqipërinë;
  - b) të nxitë dhe të zhvillojë njohuri për gjuhën, kulturën dhe trashëgiminë kulturore të Shqipërisë;
  - c) të nxitë bashkëpunimin shkencor, teknik, teknologjik, sportiv e ekonomik ndërmjet Shqipërisë dhe diasporës;
  - ç) të ofrojë informacione për investimet në Shqipëri, lehtësitë fiskale, organizimet kulturore e arsimore, takime me bashkatdhetarët dhe me institucione shtetërore në Shqipëri;
  - d) të mbështetë dhe të organizojë veprimtaritë kulturore, edukative e sportive;
  - dh) të kryejë detyra të tjera, të parashikuara nga legjislacioni në fuqi.

2. Kreu i QKD-së merr udhëzime nga ministri përgjegjës për diasporën, nëpërmjet kreut të misionit diplomatik të vendit ku është akredituar dhe i informon ata në mënyrë të rregullt për aktivitetin e tij.

#### Neni 8 Financimi i QKD-së

Mjetet për veprimtari të QKD-së sigurohen nga:

- a) buxheti i shtetit;
- b) të ardhura nga projekte, donacione dhe burime të tjera të ligjshme.

### KREU III MBAJTJA, FORCIMI DHE REALIZIMI I LIDHJEVE NDËRMJET VENDIT TË ORIGJINËS DHE DIASPORËS

#### Neni 9 Lidhjet ndërmjet vendit të origjinës dhe diasporës

Mbajtja, forcimi dhe realizimi i marrëdhënieve ndërmjet vendit të origjinës e diasporës realizohen nëpërmjet:

- a) përmirësimit të pozitës së pjesëtarëve të diasporës dhe mbrojtjes së të drejtave e interesave të tyre nëpërmjet lidhjes së marrëveshjeve ndërkombëtare dy a shumëpalëshe, në përputhje me standardet më të larta ndërkombëtare;
- b) përdorimit e mësimin të gjuhës shqipe, si dhe ruajtjes së identitetit kulturor, etnik, gjuhësor;
- c) promovimit të bashkëpunimit ekonomik, lehtësimit fiskal ndërmjet vendit të origjinës dhe diasporës;
- ç) **sigurimit të kushteve për funksionimin e Këshillit Koordinues të Diasporës;**
- d) dhënies së çmimeve kombëtare për kontribut të veçantë në ruajtjen, forcimin e lidhjeve ndërmjet vendit të origjinës dhe diasporës, promovimin e Shqipërisë dhe përkrahjen e interesave të saj.

#### Neni 10 Përkrahja për mësimin dhe avancimin e gjuhës shqipe

1. Këshilli i Ministrave, nëpërmjet ministrit përgjegjës, ndihmon në krijimin e kushteve për ruajtjen dhe mësimin e gjuhës shqipe.
2. Ministri përgjegjës, së bashku me ministrinë përgjegjëse për arsimin, sipas programit arsimor, ndihmon dhe përkrah zhvillimin e procesit mësimor të gjuhës shqipe në vendet ku ka një numër të madh pjesëtarësh të diasporës, shtrirje më kompakte apo interes të veçantë shtetëror.
3. Ministri përgjegjës për diasporën dhe ministri përgjegjës për arsimin nënshkruajnë marrëveshje dypalëshe me institucionet shtetërore homologe të vendeve ku jetojnë pjesëtarë të diasporës për organizimin e procesit mësimor të gjuhës shqipe dhe njohurive të tjera kulturore për Republikën e Shqipërisë.
4. Organizimi i procesit mësimor dhe përzgjedhja e arsimtarëve në vendet përkatëse, ku jeton dhe vepron diaspora, rregullohen me vendim të Këshillit të Ministrave, me propozimin e ministrit

përgjegjës për diasporën dhe ministrit përgjegjës për arsimin, duke respektuar marrëveshjet ndërkombëtare të nënshkruara në fuqi.

5. Ministri përgjegjës për diasporën, në bashkëpunim me ministrinë përgjegjëse për arsimin, ndihmon në shpërndarjen e librave të përshtatur për mësimin dhe avancimin e gjuhës shqipe e të njohurive të tjera kulturore për Republikën e Shqipërisë në vendet ku jeton dhe vepron diaspora.

6. Ministri përgjegjës për diasporën, në bashkëpunim me ministrinë përgjegjëse për arsimin, përgatit dhe zbaton programe për mësimin e gjuhës shqipe në distancë, nëpërmjet internetit (programe telefoni ose tabletë) dhe rrjeteve e kanaleve elektronike të komunikimit masiv, mësimin e historisë së Shqipërisë dhe njohurive të tjera kulturore për të, organizon seminare trajnuese për mësuesit, promovon dhe merr masa të ndryshme për inkurajimin e mësimit plotësues për pjesëtarët e diasporës.

#### Neni 11

##### Bashkëpunimi kulturor dhe promovimi i trashëgimisë kulturore të Shqipërisë

1. Ministri përgjegjës për diasporën, në bashkëpunim me ministrinë përgjegjëse për kulturën, përkrah aktivitetet kulturore të pjesëtarëve të diasporës, me synim ruajtjen dhe zhvillimin e identitetit, ruajtjen e trashëgimisë kulturore, si dhe promovimin e shtrirjes së tyre.

2. Në Muzeun Historik Kombëtar themelohet një pavion i veçantë për diasporën.

3. Ministri përgjegjës për diasporën, në bashkëpunim me ministrinë përgjegjëse për kulturën, mbështetin komunitetet shqiptare në shtetet e ndryshme ku ata jetojnë dhe ndihmojnë, nxisin e zhvillojnë marrëdhënie ndërkulturore ndërmjet Republikës së Shqipërisë dhe shteteve përkatëse, sipas këtij ligji dhe akteve të tjera nënligjore.

4. Ministri përgjegjës për diasporën, në bashkëpunim me ministrinë përgjegjëse për kulturën, ndihmon të rinjtë në promovimin, ruajtjen, kultivimin e identitetit kulturor, gjuhësor dhe të trashëgimisë kulturore në interes të kujtesës historike për vendin e origjinës, nëpërmjet thirrjeve publike të posaçme për bashkëpunime konkrete dhe nxjerrjen e kalendarëve të eventeve të mundshme të bashkëpunimit ndërmjet vendit të origjinës dhe diasporës.

#### Neni 12

##### Bashkëpunimi në fushën e sportit

Ministri përgjegjës për diasporën, në bashkëpunim me ministrinë përgjegjëse për sportin, përkrah aktivitetet sportive të pjesëtarëve të diasporës, me synim ruajtjen dhe zhvillimin e identitetit, të trashëgimisë kulturore, si dhe promovimin e shtrirjes së tyre.

#### Neni 13

##### Informimi

1. Radiotelevizioni Shqiptar siguron një kanal transmetimi me program radioteleviziv për diasporën. Shpenzimet për prodhimin e programeve të dedikuara për diasporën dhe transmetimin përballohen nga buxheti i shtetit.

2. Biblioteka Kombëtare, në bashkëpunim me ministritë përgjegjëse për arsimin dhe kulturën, mundëson aksesin në fondin e librave on-line, pa pagesë, për edukimin dhe letërsinë, dedikuar interesave të diasporës.



3. Këshilli i Ministrave nxit dhe inkurajon aktivitetet mediatike të pjesëtarëve të diasporës së Shqipërisë, bazuar në efikasitetin e veprimtarisë së tyre.

Neni 14  
Ekonomia dhe shkenca

1. Ministri përgjegjës për diasporën i kushton vëmendje të veçantë fuqizimit të lidhjeve ekonomike, bashkëpunimit në fushën e shkencës e të zhvillimit të teknologjive të reja ndërmjet diasporës dhe institucioneve të Republikës së Shqipërisë, nëpërmjet bashkëpunimit ekonomik dhe masave të ndryshme të politikës ekonomike, sipas legjislacionit në fuqi të Republikës së Shqipërisë.

2. Ministri përgjegjës për diasporën, në bashkëpunim me institucionet përgjegjëse shtetërore, përkrah bashkëpunimin me figurat e shquara të shkencës, pjesëtarë të diasporës, në projektet kërkimore institucionale.

Neni 15  
Çmimi vjetor i diasporës

1. Për pjesëtarët e suksesshëm të diasporës akordohet çmimi “Ambasador i kombit”.
2. Kriteret dhe mënyra e ndarjes së çmimit përcaktohen me vendim të Këshillit të Ministrave

Neni 16  
Burimet financiare

Fondet për ruajtjen dhe forcimin e lidhjeve të vendit të origjinës e diasporës sigurohen nga:

- a) buxheti i shtetit;
- b) të ardhura nga projekte, donacione dhe burime të tjera të ligjshme.

KREU IV  
ORGANIZIMI I DIASPORËS

Neni 17  
Organizata e diasporës

1. Organizata e diasporës është një organizim vullnetar, jofitimprurës i diasporës, që vepron në përputhje me rregullat e vendit të huaj ku jeton diaspora.
2. Organizata e diasporës ka si qëllim promovimin e Shqipërisë dhe përkrahjen e interesave shtetërorë të saj, ruajtjen e nxitjen e marrëdhënieve kulturore, arsimore, shkencore, humanitare dhe sportive me vendin e origjinës.

Neni 18  
**Këshilli Koordinues i Diasporës**

**1. Këshilli Koordinues i Diasporës (Këshilli) përfaqëson dhe koordinon marrëdhëniet me diasporën.**

**2. Këshilli ka këto kompetenca:**

a) identifikon problemet e diasporës, i propozon ministrit përgjegjës për diasporën veprime për zgjidhjen e tyre, përcakton linja orientuese për hartimin e strategjisë për diasporën;  
b) miraton rregulla procedurale për përmbushjen e veprimtarisë së tij dhe procedurën e vendimmarrjes.

**3. Përgjegjësitë profesionale, të përdorimit të fondeve dhe ato administrative, për Këshillin do të ushtrohen nga Agjencia Kombëtare e Diasporës.**

**4. Agjencia Kombëtare e Diasporës kryen funksionet e sekretariatit teknik.**

Neni 19

#### **Përbërja e Këshillit**

**1. Këshilli përbëhet nga 15 anëtarë, të cilët janë përfaqësues të diasporës.**

**2. Në aktivitetet e Këshillit marrin pjesë Kryeministri, ministrat përgjegjës për diasporën, punët e jashtme, punët e brendshme, për financat dhe ekonominë, arsimin, kulturën, Akademia e Shkencave, Dhoma Kombëtare e Tregtisë dhe Industrisë, Radiotelevizioni Shqiptar, Agjencia Kombëtare e Diasporës, si dhe përfaqësues të qendrave kulturore të diasporës.**

**3. Presidenti i Republikës, me kërkesën e tij dhe në koordinim me Kryeministrin dhe ministrin e shtetit përgjegjës për diasporën, merr drejtimin e mbledhjeve të veçanta të Këshillit Koordinues të Diasporës.**

Neni 20

#### **Kriteret për zgjedhjen në Këshill**

**1. Përfaqësuesit e diasporës, të cilët do të jenë anëtarë në Këshill, duhet të përmbushin këto cilësi:**

a) të kenë integritet të lartë dhe reputacion në komunitetin ku ata jetojnë;

b) të kenë aftësi për të përmbushur detyrat për mbajtjen dhe forcimin e marrëdhënieve ndërmjet vendit të origjinës e diasporës.

**2. Përfaqësuesit e diasporës zgjidhen sipas këtij rendi:**

a) tre përfaqësues nga diaspora e Shteteve të Bashkuara të Amerikës;

b) dy përfaqësues nga diaspora e Kanadasë;

c) gjashtë përfaqësues nga diaspora e Europës;

ç) një përfaqësues nga diaspora e Turqisë;

d) një përfaqësues nga diaspora e Australisë;

dh) dy përfaqësues nga Britania e Madhe.

**3. Rregullat e hollësishme për kushtet dhe mënyrën e zgjedhjes së përfaqësuesve përcaktohen me vendim të Këshillit të Ministrave.**

**4. Vendi i origjinës nuk ushtron influencë në procedurat dhe kushtet e zgjedhjes së përfaqësuesve në Këshill.**

**5. Vendimi për zgjedhjen e përfaqësuesve i njoftohet ministrit përgjegjës për diasporën të paktën 30 ditë përpara datës së përcaktuar për mbledhjen e Këshillit.**

Neni 21

#### **Mbledhja e Këshillit**

- 1. Këshilli mblidhet, si rregull, Ditën Kombëtare të Diasporës.**
- 2. Këshilli mund të mblidhet në sesion të jashtëzakonshëm, me kërkesën e, të paktën, 1/3 së të përfaqësuarve ose me kërkesë të ministrit përgjegjës për diasporën, me një program të përcaktuar paraprakisht.**
- 3. Këshilli, sipas nevojës, mund të krijojë grupe pune për të trajtuar çështje teknike, me natyrë ekonomike, statutore, kulturore, shkencore e sportive. Numri i anëtarëve dhe mënyra e organizimit e funksionimit të grupeve të punës përcaktohet me vendim të Këshillit Koordinues të Diasporës.**

#### Neni 22

#### Fondi Shqiptar për Zhvillimin e Diasporës

1. Fondi Shqiptar për Zhvillimin e Diasporës ka për mision sigurimin dhe shpërndarjen e mjeteve financiare, në kuadrin e nxitjes së zhvillimit social-ekonomik e kulturor, bazuar në strategjitë e caktuara prioritare për diasporën, si edhe brenda vendit, nëpërmjet promovimit, inkurajimit dhe orientimit të prirjeve filantropike dhe investimeve të diasporës në mbështetje të zhvillimit në Republikën e Shqipërisë e jashtë saj.
2. Fondi Shqiptar për Zhvillimin e Diasporës shërben si mekanizëm i njohur nga ligji për orientimin e prirjeve filantropike/donacioneve dhe investimeve të anëtarëve të diasporës në përpjekjet për zhvillimin social-ekonomik e kulturor në Republikën e Shqipërisë dhe jashtë saj.
3. Rregullat për veprimtarinë, organizimin dhe funksionimin e Fondit Shqiptar për Zhvillimin e Diasporës miratohen me ligj të veçantë.

#### KREU V

#### DISPOZITA KALIMTARE DHE TË FUNDIT

#### Neni 23

#### Qendra e Botimeve për Diasporën

1. Botimi i teksteve të veçanta, të cilat i shërbejnë diasporës, realizohet nëpërmjet Qendrës së Botimeve për Diasporën që financohet nga buxheti i shtetit dhe organizohet e funksionon në varësi të ministrit përgjegjës për diasporën.
2. Krijimi, organizimi dhe funksionimi i Qendrës së Botimeve për Diasporën rregullohet me vendim të Këshillit të Ministrave.

#### Neni 24

#### Marrëdhëniet me Kuvendin e Shqipërisë

Për ndjekjen dhe mbikëqyrjen e zbatimit të këtij ligji, në përbërje të Komisionit të Përhershëm për Politikën e Jashtme të Kuvendit të Shqipërisë, krijohet një nën komision “Për diasporën dhe migracionin”, i cili organizohet dhe funksionon sipas parashikimeve ligjore për nën komisionet e Kuvendit të Republikës së Shqipërisë.

#### Neni 25

## Dita e diasporës

Data 18 dhjetor caktohet si Dita Kombëtare e Diasporës.

Neni 26

Fondi Shqiptar për Zhvillimin e Diasporës, Këshilli Koordinues për Diasporën, Qendrat Kulturore për Diasporën dhe Qendra e Botimeve për Diasporën kanë logot e tyre. Modeli i logove është sipas formatit të anekseve bashkëlidhur këtij ligji.

Neni 27

Aktet nënligjore

Ngarkohet Këshilli i Ministrave për nxjerrjen e akteve nënligjore në zbatim të neneve 4; 6, pikat 5 e 6; 10, pika 4; 15, pika 2; 20, pika 3; dhe 23, pika 2, të këtij ligji.

Neni 28

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

**K R Y E T A R I**

**Gramoz RUÇI**

Miratuar në datën 5.4.2018



**REPUBLIKA E SHQIPËRISË  
KËSHILLI I MINISTRAVE**

**V E N D I M**

**Nr.340, datë 6.6.2018**

**PËR**

**PËRCAKTIMIN E RREGULLAVE TË HOLLËSISHME  
PËR KUSHTET DHE MËNYRËN E ZGJEDHJES  
SË PËRFAQËSUESVE TË KËSHILLIT KOORDINUES  
TË DIASPORËS**

Në mbështetje të nenit 100 të Kushtetutës dhe të pikës 3, të nenit 20, të ligjit nr.16/2018, “Për diasporën”, me propozimin e ministrit të Shtetit për Diasporën, Këshilli i Ministrave

**V E N D O S I:**

1. Përcaktimin e rregullave të hollësishme për kushtet dhe mënyrën e zgjedhjes së 15 përfaqësuesve të Këshillit Koordinues të Diasporës.
2. Përfaqësuesit e diasporës, kandidatë për anëtarë në Këshillin Koordinues të Diasporës, përveç kritereve të parashikuara në ligjin nr.16/2018, “Për diasporën”, duhet të përmbushin edhe këto kritere:
  - a) Të jenë persona të spikatur në fushat e arsimit, shkencës, teknologjisë, kulturës, sportit etj, apo të suksesshëm në fushën e biznesit;
  - b) Të jenë persona të njohur në fushën e filantropisë dhe të kenë kontribuar në çështje që lidhen me diasporën apo vendin e origjinës;
  - c) Të jenë pjesë aktive e forumeve organizative të diasporës në vendet pritëse.
3. Për procedurën e propozimit e të zgjedhjes duhet të zbatohen edhe dispozitat e legjislacionit në fuqi për parandalimin e konfliktit të interesave në ushtrimin e funksioneve publike.
4. Numri i kandidaturave duhet të jetë jo më pak se dyfishi i numrit të përfaqësimit, duke iu referuar rendit të përcaktuar në pikën 2, të nenit 20, të ligjit nr.16/2018, “Për diasporën”.

5. Ambasadorët e jashtëzakonshëm dhe fuqplotë të Republikës së Shqipërisë, të akredituar jashtë vendit, nëpërmjet ministrit përgjegjës për punët e jashtme i propozojnë ministrit përgjegjës për diasporën kandidatët për Këshillin Koordinues të Diasporës.

6. Ambasadorët bashkëpunojnë me organizatat e diasporës, të njohura e të regjistruara sipas legjislationit të vendit pritës, për gjetjen e kandidatëve.

7. Për raste të veçanta ose në mungesë të kandidatëve të propozuara, propozimi për zgjedhjen e anëtarëve të Këshillit Koordinues të Diasporës (jo më shumë se 3 propozime) mund të bëhet drejtpërdrejt nga ministri përgjegjës për diasporën.

8. Propozimet duhet të shoqërohen me jetëshkrime e dokumente, kualifikime dhe vlerësime të nevojshme të veprimtarisë së përfaqësuesit të propozuar.

9. Në vijim të propozimeve të ardhura, ministri përgjegjës për diasporën përzgjedh 15 kandidatët për anëtarë të Këshillit Koordinues të Diasporës, dhe ia përcjell për miratim Këshillit të Ministrave.

10. Të paktën 30 për qind e anëtarësisë duhet të jetë e përfaqësuar nga gjinia femërore.

11. Përfaqësuesit e Këshillit Koordinues të Diasporës zgjidhen për një periudhë 4-vjeçare, me të drejtë rrizgjedhjeje jo më shumë se dy herë.

12. Anëtari i Këshillit Koordinues të Diasporës lirohet para mbarimit të mandatit 4-vjeçar, në rastet kur:

- a) jep dorëheqjen, me kërkesë individuale;
- b) ushtron veprimtarinë në kushtet e konfliktit të interesit;
- c) lirohet për shkaqe të tjera.

13. Anëtari i Këshillit Koordinues të Diasporës shkarkohet para mbarimit të mandatit 4-vjeçar, në rastet kur:

- a) neglizhon kryerjen e detyrave dhe pjesëmarrjen e rregullt në mbledhjet e këshillit drejtues;
- b) nuk përmbush funksionet e parashikuara nga ligji nr.16/2018, “Për diasporën”, dhe nga ky vendim;
- c) nuk merr pjesë, pa arsye, në mbledhje për më shumë se 2 herë radhazi;
- ç) bëhet i paaftë për të kryer funksionet e ngarkuara për shkak të sëmundjeve fizike ose mendore;
- d) gjatë ushtrimit të funksioneve të tij, vepron në kundërshtim me interesat e Këshillit Koordinues të Diasporës.

14. Ministri përgjegjës për diasporën, jo më vonë se 30 ditë pune para mbledhjes së ardhshme të Këshillit Koordinues të Diasporës, i propozon Këshillit të Ministrave kandidatët e rinj, për të zëvendësuar anëtarin e liruar apo të shkarkuar. Mandati i zëvendësuesit llogaritet i plotë, nga dita e emërimit të tij.

15. Përjashtimisht për zgjedhjet e para, propozimet duhet të dorëzohen para fundit të muajit gusht

2018.

16. Ngarkohen ministri i Shtetit për Diasporën, ministri përgjegjës për punët e jashtme dhe Agjencia Kombëtare për Diasporën për zbatimin e këtij vendimi.

Ky vendim hyn në fuqi pas botimit në “Fletoren zyrtare”.

**K R Y E M I N I S T R I**

**E D I R A M A**

**REPUBLIKA E SHQIPËRISË  
KËSHILLI I MINISTRAVE**

**V E N D I M**

**Nr. 195, datë 05. 04. 2019**

**PËR**

**MIRATIMIN E ANËTARËVE TË KËSHILLIT KOORDINUES TË DIASPORËS**

Në mbështetje të nenit 100 të Kushtetutës së Republikës së Shqipërisë, të pikës 1 të nenit 19, dhe nenit 20, të ligjit nr. 16/2018, datë 05.04.2018 “Për diasporën”, dhe të pikës 9, të vendimit nr. 340, datë 6.6.2018 të Këshillit të Ministrave “Për përcaktimin e rregullave të hollësishme për kushtet dhe mënyrën e zgjedhjes së përfaqësuesve të Këshillit Koordinues të Diasporës”, me propozimin e Ministrit të Shtetit për Diasporën, Këshilli i Ministrave,

**V E N D O S I:**

1. Të miratojë përbërjen e Këshillit Koordinues të Diasporës nga anëtarët e përzgjedhur sipas rendit të mëposhtëm:

- Z. Mark Gjonaj – përfaqësues nga diaspora e Shteteve të Bashkuara të Amerikës;
- Z. Visar Tasimi - përfaqësues nga diaspora e Shteteve të Bashkuara të Amerikës;
- Znj. Esmeralda Mosko - përfaqësues nga diaspora e Shteteve të Bashkuara të Amerikës;
- Znj. Adriana Fishta Bejko - përfaqësues nga diaspora e Kanadasë;
- Z. Ardian Radovicka - përfaqësues nga diaspora e Kanadasë;
- Z. Lazim Destani - përfaqësues nga diaspora e Gjermanisë;
- Z. Sokrat Sinaj - përfaqësues nga diaspora e Zvicrës;
- Z. Ardian Lekaj - përfaqësues nga diaspora e Hollandës;
- Z. Rosario Peta - përfaqësues nga diaspora e Italisë;
- Znj. Anila Hyka Smorgrav - përfaqësues nga diaspora e Francës;
- Z. Gazmend Kapllani - përfaqësues nga diaspora e Greqisë;
- Z. Namik Shabi - përfaqësues nga diaspora e Turqisë;
- Z. Bashkim Bekiri - përfaqësues nga diaspora e Australisë;
- Znj. Brikena Muharremi – përfaqësues nga Britania e Madhe;
- Z. Endri Hatillari – përfaqësues nga Britania e Madhe.

2. Mbledhja e parë e Këshillit Koordinues të Diasporës do të mbahet në Ditën Kombëtare të Diasporës, më 18 dhjetor 2019.



3. Ngarkohen ministri përgjegjës për diasporën, ministri përgjegjës për punët e jashtme dhe Agjencia Kombëtare për Diasporën për zbatimin e këtij vendimi.

Ky vendim hyn në fuqi pas botimit në Fletoren Zyrtare.

**K R Y E M I N I S T R I**

**E D I R A M A**

**REPUBLIKA E SHQIPËRISË  
KËSHILLI I MINISTRAVE**

**V E N D I M**

**Nr.320, datë. 15.05.2019**

**PËR**

**STATUSIN E ANËTARËVE TË KËSHILLIT KOORDINUES  
TË DIASPORËS**

Në mbështetje të nenit 100 të Kushtetutës dhe të shkronjës “a”, të nenit 5, të ligjit nr.16/2018, “Për diasporën”, me propozimin e ministrit të Shtetit për Diasporën, Këshilli i Ministrave

**V E N D O S I:**

1. Anëtarët e Këshillit Koordinues të Diasporës, gjatë kohëzgjatjes së mandatit dhe ushtrimit të aktiviteteve të tyre, gëzojnë status të veçantë në përputhje me parashikimet e këtij vendimi.
2. Anëtarët e Këshillit Koordinues të Diasporës, në funksion të përmbushjes së detyrave për mbrojtjen dhe forcimin e marrëdhënieve ndërmjet vendit të origjinës dhe diasporës, kanë të drejtë:
  - a) të kërkojnë informacion me interes në fushën e përgjegjësisë që mbulojnë nga institucionet shtetërore përgjegjëse;
  - b) të propozojnë akte administrative pranë institucioneve shtetërore që lidhen me interesat e komuniteteve shqiptare në diasporë;
  - c) të marrin pjesë në seanca dëgjimore në Komitetin Shtetëror të Diasporës ose komisionet e Kuvendit të Shqipërisë për çështje që kanë të bëjnë me interesat e diasporës shqiptare;
  - d) të pajisen me një adresë zyrtare nga domain-i @diaspora.gov.al.
3. Anëtarët e Këshillit Koordinues të Diasporës gëzojnë të drejtën e trajtimit me prioritet të menjëhershëm dhe të drejtpërdrejtë nga ambasadorët e jashtëzakonshëm dhe fuqiplotë të Shqipërisë si dhe nga drejtuesit e misioneve diplomatike në vendet përkatëse, sa herë që është e domosdoshme për mbarëvajtjen e punës.
4. Përgjegjësitë profesionale të përdorimit të fondeve dhe ato administrative, për Këshillin, do të ushtrohen nga Agjencia Kombëtare e Diasporës.
5. Agjencia Kombëtare e Diasporës kryen funksionet e sekretariatit teknik të Këshillit Koordinues të Diasporës shqiptare.

6. Shpenzimet për udhëtimin, akomodimin dhe dietat për realizimin e mbledhjeve zyrtare të anëtarëve të Këshillit Koordinues të Diasporës mbulohen nga buxheti i miratuar për Agjencinë Kombëtare për Diasporën, në përputhje me legjislacionin në fuqi.

7. Ngarkohen ministri i Shtetit për Diasporën, Ministria për Evropën dhe Punët e Jashtme dhe Agjencia Kombëtare për Diasporën, për zbatimin e këtij vendimi.

Ky vendim hyn në fuqi pas botimit në “Fletoren zyrtare”.

**K R Y E M I N I S T R I**

**EDI RAMA**

**Në mungesë dhe me porosi**

**ZËVENDËSKRYEMINISTRI**

**ERION BRAÇE**

**MINISTRI I SHETIT PËR DIASPORËN**

**PANDELI MAJKO**

## ANETARET E KESHILLIT KOORDINUES TE DIASPORES

- |   |                             |   |
|---|-----------------------------|---|
|    | <b>Adriana Fishta-Bejko</b> |    |
|    | <b>Anila Hyka Smorgrav</b>  |    |
|    | <b>Ardian Lekaj</b>         |    |
|    | <b>Ardian Radovicka</b>     |    |
|    | <b>Bashkim Bekiri</b>       |    |
|    | <b>Brikena Muharremaj</b>   |    |
|   | <b>Endri Hatillari</b>      |   |
|  | <b>Esmeralda Mosko</b>      |  |
|  | <b>Gazmend Kapllani</b>     |  |
|  | <b>Lazim Destani</b>        |  |
|  | <b>Mark Gjonaj</b>          |  |
|  | <b>Namik Shabi</b>          |  |
|  | <b>Rosario Petta</b>        |  |
|  | <b>Sokrat Sinaj</b>         |  |
|  | <b>Visar Tasimi</b>         |  |

## JETESHKRIMET E ANETAREVE TE KESHILLIT KOORDINUES TE DIASPORES



### Kanada – Adriana Fishta-Bejko

Doktor i shkencave në psikiatri me fokus në përvetësimin e gjuhëve të huaja. Znj. Fishta-Bejko është një intelektuale e njohur si mësimdhënëse, autore dhe studiuese shkencore. Gjatë 42 viteve si edukatore ka arritur të krijojë raporte me drejtues në fushën e arsimit, prindërve dhe nxënësve, duke pasur influencë pozitive në vende të ndryshme të botës me mësimdhënie në disa kontinente dhe shumë shtete. Për arritjet e saj në fushën e arsimit në vitin 2002 ajo u laureua me çmimin “who’s who” për kontinentin Amerikan dhe çmimin e dytë për “Emigrant of Achievement”, Calgary, Alberta. Në maj 2018 ajo u zgjodh kryetare e bordit të shkollës “Foleja e Shqiponjave” në Calgary, Alberta.

Email: [Adriana.Bejko@diaspora.gov.al](mailto:Adriana.Bejko@diaspora.gov.al)



### Francë – Anila Hyka Smorgrav

Profesioniste në fushën e IT dhe telekomit. Ka kryer studimet me rezultate të shkëlqyera Master në Oslo për IT njëkohësisht filloi të punojë si pedagoge pranë këtij institucioni. Është diplomuar dhe me master MBA në ESCP Europë, një nga shkollat e biznesit me prestigjioze të Europës. Njëkohësisht ajo drejton projekte dhe është konsulente biznesesh të rëndësishme në gjithë Evropën. Aktiviste e organizatave shqiptare në migracion, drejtuese e shoqatës franko-shqiptare “Albania” në Paris.

Email: [Anila.Smorgrav@diaspora.gov.al](mailto:Anila.Smorgrav@diaspora.gov.al)



### Hollandë – Ardian Lekaj

Lekaj është një histori suksesi në fushën e biznesit evropian dhe më gjerë. Ka mbaruar studimet për ekonomi në Universitetin e Tiranës ndërsa studimet Master i ka kryer në Hollandë për sigurime shoqërore. Që prej 1991 jeton në Hollandë duke drejtuar një sërë projektesh në infrastrukturë në të gjithë Evropën. Është një ekspert i rëndësishëm financiar duke drejtuar biznese dhe projekte me vlera të konsiderueshme financiare. Z. Lekaj është aktivist dhe mbështetës i komuniteteve shqiptare jashtë vendit.

Email: [Ardian.Lekaj@diaspora.gov.al](mailto:Ardian.Lekaj@diaspora.gov.al)



#### **Kanada – Ardian Radovicka**

Me pasion pikturën edhe pse me profesion inxhinier, ka emigruar ne Kanada në 2006, ku zhvillon aktivitete të ndryshme artistike dhe kulturore. Z. Radovicka jep një ndihmë të çmuar sidomos ndaj edukimit dhe këshillimit të karrierës së të rinjve shqiptarë në Kanada duke i orientuar drejt tregut kanadez të punës. Në 2016 zgjidhet anëtar i klubit të Artit “Don Valley”.

Email: [Ardian.Radovicka@diaspora.gov.al](mailto:Ardian.Radovicka@diaspora.gov.al)



#### **Australi – Bashkim Bekiri**

Bekiri është Kryetar i Shoqatës së Komunitetit Shqiptaro – Australian. Ai ka merita të veçanta në organizimin e komunitetit shqiptar në Australi duke mbajtur njëkohësisht lidhjet me vendlindjen. Ka iniciuar një sërë aktivitete kushtuar kulturës dhe traditës shqiptare duke qenë një protagonist i komunitetit shqiptar në Australi.

Email: [Bashkim.Bekiri@diaspora.gov.al](mailto:Bashkim.Bekiri@diaspora.gov.al)



#### **Britani e Madhe – Brikena Muharremaj**

Avokatja e parë shqiptare femër në Mbretërinë e Bashkuar që në vitin 2005. Znj. Brikena ka kryer studimet Bachelor në Drejtësi në Universitetin Westminster në Londër. Prej 5 vitesh është kryetare e shoqatës se Avokatëve Shqiptarë në Mbretërinë e Bashkuar (BALA). Aktualisht është e licensuar në Londër si Barrister, avokate me të drejta te përfaqësimit në të gjitha gjykatat në Angli dhe në Wells. Aktiviste e njohur në komunitetin shqiptar në Britaninë e Madhe.

Email: [Brikena.Muharremaj@diaspora.gov.al](mailto:Brikena.Muharremaj@diaspora.gov.al)



### **Britani e Madhe – Endri Hatillari**

Z. Hatillari është i lindur në Tiranë, dhe jeton prej më shumë se dhjetë vitesh në Britani të Madhe, ku edhe ka kryer studimet Universitare dhe ato pas Universitare për “Menaxhim Zhvillimi (Development Management)” duke u diplomuar me “Master Shkencor”. Eksperienca e tij profesionale konsiston në shumë pozicione menaxheriale duke punuar për një sërë korporatash ndërkombëtare, si në sektorin e “Telekomunikacionit”, atë të “Sistemit Bankar”, si dhe në organizata ndërkombëtare “Jo Qeveritare”, “Autoritete Lokale” në Londër, dhe “Sistemin Arsimor Universitar”. Aktualisht Z. Hatillari punon në Bashkinë e Brent, në veri-perëndim të Londrës, në Departamentin e Strehimit, çka i mundëson një kontakt të përditshëm me komunitetin Shqiptar në Britani. Ai u përzgjedh si kandidat në zgjedhjet lokale të vitit 2018 për Bashkinë “Harrow” në veri të Londrës dhe prej shumë vitesh luan një rol tepër aktiv në konsolidimin dhe promovimin e vlerave të komunitetit shqip-folës në Britaninë e Madhe.

Email: [Endri.Hatillari@diaspora.gov.al](mailto:Endri.Hatillari@diaspora.gov.al)



### **SHBA – Esmeralda Mosko**

Këshilltare bordi e Organizatës së Gruas Shqiptaro-Amerikane “Motrat Qirjazi” me qendër në New York. Themeluese e Fondacionit “Global Albanians Foundation”. Interesat e saj janë të fokusuara në të drejtat e fëmijëve, advokimin për edukimin dhe të drejtat e njeriut. Fillimisht ka punuar në ambasadën e SHBA-së në Tiranë ku i është dhënë titulli i nderit “Meritorious Honor Award” nga Departamenti Amerikan i Shtetit.

Email: [Esmeralda.Mosko@diaspora.gov.al](mailto:Esmeralda.Mosko@diaspora.gov.al)



### **Greqi – Gazmend Kapllani**

Gazmend Kapllani ka kryer studime doktorale në shkencë Juridike dhe Filozofi në Athinë. Ai prej vitesh është profesor në universitet dhe ka një sërë publikimesh politike, letrare në gjuhën greke si dhe ka realizuar disa kërkime shkencore. Ka kontribut aktiv në jetën politike në shtetin grek si dhe pjesëmarrje aktive në disa konferenca ndërkombëtare. Aktualisht është shkrimtar i suksesshëm, dramaturg, gazetar dhe mbrojtës i të drejtave të migrantëve shqiptarë në Greqi.

Email: [Gazmend.Kapllani@diaspora.gov.al](mailto:Gazmend.Kapllani@diaspora.gov.al)



### **Gjermani – Lazim Destani**

Lindur në Tetovë, ka emigruar në moshë të hershme drejt Gjermanisë për arsye ekonomike. Në 1987 themelon biznesin parë me objekt transportin, “Sharri Tours”. Ka ndjekur çështjen shqiptare në rajon i shqetësuar për papunësinë dhe situatën ekonomike. E konsideron detyrë humanitare dhe patriotike mbështetjen e vazhdueshme dhe progresive në arsim, sport dhe kulturë. Ka marrë disa tituj nderi si nga autoritetet me të larta shqiptare: “Doctor Honoris Causa” në Universitetin e Tetovës, Medaljen e meritave nga Presidenti i Republikës së Kosovës dhe titullin “Nderi i Kombit” nga Presidenti i Republikës së Shqipërisë në 2012.

Email: [Lazim.Destani@diaspora.gov.al](mailto:Lazim.Destani@diaspora.gov.al)



### **SHBA- Mark Gjonaj**

Këshilltar në Bashkinë e New York-ut, ku përfaqëson Distriktin e Bronxit. I diplomuar në “Saint John’s University”, z. Mark Gjonaj është i pari shqiptaro-amerikan në bashkinë e New York-ut zgjedhur që prej 2017, ndërsa në 2012-2017 ka qenë anëtar i asamblesë së shtetit të New Yorkut. Aktivist i hershëm në çështjen e Diasporës shqiptare në shërbime filantropike duke dhënë një kontribut të vazhdueshëm për kauzën shqiptare.

Email: [Mark.Gjonaj@diaspora.gov.al](mailto:Mark.Gjonaj@diaspora.gov.al)



### **Turqi – Namik Shabi**

Kryetari i shoqatës “Vatra” në Turqi me aktivitet të rëndësishëm në promovimin e shqiptarëve në shoqërinë turke, njëkohësisht edhe lobues për investimet e huaja në trevat shqiptare. Z. Shabi ka kontribut në ngritjen e qendrave kulturore shqiptare si dhe rimëkëmbjen e shoqatave shqiptare në Turqi. Z. Shabi ka qenë organizator i një sërë aktiviteteve me pjesëmarrje të gjerë të komuniteti shqiptar në shtetin e Turqisë.

Email: [Namik.Shabi@diaspora.gov.al](mailto:Namik.Shabi@diaspora.gov.al)





### **Itali – Rosario Petta**

Kryetar Bashkie në “Piana dei Albanesi”, komuna arbëreshe në Itali. Ai ka kontribut të vyer në ruajtjen e gjuhës dhe traditave arbëreshe si dhe organizimet kulturore si kryetar bashkie dhe anëtar i këshillit bashkiak prej vitesh. Z. Petta është aktivist dhe koordinator i dalluar në aktivitetet e organizuara nga komuniteti arbëresh, sidomos në marrëdhënie me vendin e origjinës.

Email: [Rosario.Petta@diaspora.gov.al](mailto:Rosario.Petta@diaspora.gov.al)



### **Zvicër – Sokrat Sinaj**

I lindur në nëntor 1956, Sokrat Sinaj studioi shkencat bujqësore në Institutin e Lartë Bujqësor në Kamëz, Tiranë. Në vitin 1993 mbrojti me rezultate maksimale doktoraturën (PhD) për shkencat bujqësore në Institutin Kombëtar Politeknik të Lorenës, Nancy, Francë. Pas doktoraturës për dy vjet ka kryer një qëndrim postdoctoral në Qendrën Kombëtare Franceze të Kërkimit Shkencor (CNRS) po në Nancy, Francë. Nga viti 1995, për 12-vjet punoi si Profesor i asociuar në Departamentin e Agronomisë të Universitetit Politeknik Federal të Zyrihut në Zvicër dhe nga viti 2007 është përgjegjës për kërkimet shkencore në fushën e të ushqyerit të bimëve bujqësore, në Institutin Kombëtar të Kërkimeve Bujqësore, Zvicër. Ne vitin 2005 është kualifikuar Profesor i Universiteteve franceze nga Ministria franceze e Arsimit dhe Shkencës dhe Profesor i Republikës së Shqipërisë nga Ministria shqiptare e Arsimit dhe Shkencës. Sinaj ka koordinuar projekte të shumta shkencore me impakt nderkombëtar dhe ka publikuar më shumë se 150 artikuj në revistat shkencore me prestigjoze të fushës. Ai është anëtar i komiteteve shkencore për disa revista ndërkombëtare dhe mbështet aktivisht interesat e komunitetit shqiptar jashtë vendit.

Email: [Sokrat.Sinaj@diaspora.gov.al](mailto:Sokrat.Sinaj@diaspora.gov.al)



### **SHBA – Visar Tasimi**

Themelues i shkollës shqipe në Waterbury në 2011, njëkohësisht themelues i bursës vjetore “Albanian Community Scholarship” dhe drejtor i festivalit artistik shqiptar në Waterbury. Ka bashkëpunime të vazhdueshme me senatin amerikan dhe ka qenë disa herë i ftuar në kuvendin e Connecticutit për mbrojtjen e mësimin në gjuhën shqipe dhe njohjes së lejeve të drejtimit në SHBA.

Email: [Visar.Tasimi@diaspora.gov.al](mailto:Visar.Tasimi@diaspora.gov.al)